

禮記正義卷第十五

國子祭酒上護軍曲阜縣開國子孔穎達等奉

勅撰

王制第五

正義曰案鄭目錄云名曰王制者以其記先王班爵授  
祿祭祀養老之法度此於別錄屬制度王制之作蓋在  
秦漢之際知者案下文云有正聽之鄭云漢有正平承  
秦所置又有古者以周尺之言今以周尺之語則知是  
周亡之後也秦昭王亡周故鄭其臨碩云孟子當赧王  
之際王制之作復在其後盧植二漢孝文皇帝令博士  
諸生作此  
王制之書



孫氏

集

禮記卷十五

王者之制祿爵公侯伯子男凡五等諸侯

之上大夫卿下大夫上士中士下士凡五

等二五象五行剛柔十日祿所**疏**正義曰此一經論

受食爵秩次也上大夫曰卿公侯卿大夫以下及士之法凡王者之制度祿爵為重其食祿受爵之人有公侯伯子男並南面之君凡五等也其諸侯之下北面之臣有上大夫卿有下大夫有上士有中士有下士凡五等也南面之君五者法五行之剛日北面之臣五者法五行之柔日不以王朝之臣而以諸侯臣者王朝之臣本是事王今王制統天下故不自在其數謂制統天下之君及天下之臣取君臣自相對故不取王臣也此作記者雖記虞氏皇而祭之文大都摠記三王制度故言王者之制不云帝皇制也不云天子制者白虎通云王是天子爵號穀梁傳曰王者仁義歸往曰王以其身有仁義

眾所歸往謂之王王者制統海內故云王制不云天子制也凡王者不得稱官故學記云大德不官而得稱職故詩云衮職有闕考工記云國有六職坐而論道謂之王公是也此並互文以見義既天子不官亦當不主一職若以主天下為職亦得管天下為官矣祿者穀也故鄭注司祿云祿之言穀年穀豐乃後制祿援神契云祿者錄也白虎通云祿者錄也上以收錄接下下以名錄謹以事上是也爵者盡也熊氏云醮盡其才而用之故白虎通云爵者盡也所以盡人才是也案下文云位定然後祿之又大司徒云十有一曰以賢制爵十有二曰以庸制祿並祿在爵後此祿在爵前者祿是田財之物班布在下最是國之重事須裁節得所王者制度重之故在於先故此經下文先云天子之田乃云諸侯之田次云制農田又云下士視上農夫祿又云君十卿祿並先言祿下始云次國上卿當大國中卿是後云爵也熊氏皇氏以為試功之祿故在爵前案此王者制度必當舉其正禮何得唯明試功之祿下云君十

卿祿豈試功乎熊氏皇氏之說於義疑也 公者案元命包云公者為言平也公平正直 侯者候也候王順逆 伯者伯之為言白也明白於德也 子者奉恩宣德 男者任功立業此五等者謂虞夏及周制殷則三等公侯伯也此公侯伯子男獨以侯為名而稱諸侯者舉中而言又爾雅侯為君故以侯言之伯亦居中不言諸伯者嫌是東西二伯及九州之伯故也 上大夫卿者見下文云下大夫倍上士卿四大夫祿是下大夫之上則有卿故知上大夫即卿也此上大夫卿外唯有下大夫所以下文除卿之外更有上大夫下大夫者謂就下大夫之中更分為上下耳卿者白虎通云卿之言嚮也為人所歸嚮大夫者達人謂扶達於人士者事也皇氏熊氏皆為任職事其大夫之稱亦得兼三公故詩云三事大夫謂三公也上大夫卿亦兼孤也故春秋陽處父為大傅經云晉殺其大夫陽處父是也孤亦稱公故鄉飲酒禮云公三重是孤也卿亦得稱公故春秋襄三十年傳云鄭伯有之臣稱伯有曰吾公在

皇谷士既命同而分為三等者言士職卑德薄義取漸進故細分為三卿與大夫德高位顯各有別命不復細分其諸侯以下及三公至士摠而言之皆謂之官官者管也以管領為名若指其所主則謂之職故周禮云設官分職通卿大夫士也知諸侯亦為官者尚書周官云唐虞稽古建官惟百下云外有州牧侯伯是州牧侯伯亦為官也若細而言之諸侯非偏有所主則非官也故學記云大德不官注云天子諸侯是也諸侯亦稱職故左傳云小有述職大前大夫以上有爵故士冠禮云古者生無爵死無謚謂士也周則士亦有爵故鄭注周制以士為爵死猶不為謚耳是也 注二五象五行剛柔十日 正義曰知象陰陽者案元命包云周爵五等法五精注云五精是其摠法五行分之則法五剛甲丙戊庚壬其諸侯之臣法五柔乙丁己辛癸 天子之田方千里 象日月之大亦取畧同也是也 此謂縣內以祿公卿大夫

元士公侯田方百里伯七十里子男五十里

不能五十里者不合於天子附於諸侯曰

附庸天子之三公之田視公侯天子之卿

視伯天子之大夫視子男天子之元士視

附庸 皆象星辰之大小也不合謂不朝會也小城曰附庸附庸者以國事附於大國未能以其名通也視

猶比也元善也善士謂命士也此地殷所因夏爵三等之制也殷有鬼侯梅伯春秋變周之文從殷之質合伯子男

以為一則殷爵三等者公侯伯也異畿內謂之子周武王初定天下更立五等之爵增以子男而猶因殷之地以九

州之界尚狹也周公攝政致大平斥大九州之界制禮成武王之意封王者之後為公及有功之諸侯大者地方五

百里其次侯四百里其次伯三百里其次子二百里其次

男百里所因殷之諸侯亦以功黜陟之其不合者皆益之

地為百里焉是以周世有爵尊而國小爵卑而國 **疏** 正

大者唯天子畿內不增以祿羣臣不主為治民 **疏** 正義

曰此一節論天子畿內之田及畿外五等諸侯及畿內公

卿受地多少之法各隨文解之 **疏** 象日至元士 正義

曰案元命包云日圓望之廣尺以應千里故云象日月之

大亦取晷同也者案考靈耀云地與星辰四遊外降於三

萬里之中夏至之景尺有五寸是半三萬里得萬五千里 **疏** 鄭注司徒云凡日景於地千里而差一寸是千里同一寸也細而言之就千里之內亦漸漸分數不同此云同寸者大略而言之非但象日月大小又取晷同故云亦云以祿公卿大夫元士者即下文三公之田視公侯天子之卿視伯以下是也案下注云待封王之子弟此唯言公卿大夫元士者舉正者言之耳 **疏** 皆象至治民 正義曰皆象星辰之大小也者案元命包云王者封之上應列宿

之位注云若角亢為鄭房心為宋之比又云其餘小國不  
中星辰者以為附庸是象星辰大小也非但象星辰其百  
里者又象雷故援神契云王者之後稱公大國稱侯皆千  
乘象雷震百里是取法於雷也其七十里者倍減於百里  
五十里者倍減於七十里故孝經云德不倍者不異其爵  
功不倍者不異其土故轉相半別優劣云不合謂不朝會  
也者謂不得與諸侯集合朝會天子也云小城曰附庸者  
庸城也謂小國之城不能自通以其國事附於大國故曰  
附庸此不能五十里故為小國之城若詩崇墉言言及易  
公用射隼于高墉之上是大國之城亦名庸也云元善也  
善士謂命士也者案易文言云元者善之長也故元為善  
也案周禮注天子上士三命中士再命下士一命故云善  
士謂命士則上中下之士皆稱元士也天子之士所以稱  
元者異於諸侯之士也周禮公侯伯之士雖一命不得稱  
元士其夏殷以上諸侯之士皆不命也故下文云小國之  
與下大夫一命是士不得命也云此地殷所因夏爵三

等之制也者以夏會諸侯於塗山執玉帛者萬國若不百  
里七十里五十里則不得為萬國也故知夏爵三等之制  
知此經文不直舉夏時而云殷所因者若經指夏時則下  
當云萬國不得云凡九州千七百七十三國故以為殷所  
因夏爵三等之制也其國則少於夏也云殷有鬼侯梅伯  
案明堂位云脯鬼侯又呂氏春秋云昔紂為無道殺梅伯  
而醢之殺鬼侯而脯之以禮諸侯於廟楚辭云梅伯菹醢  
是殷有鬼侯梅伯也鄭引此者證殷有侯有伯二王之後  
稱公則殷亦有公可知也云春秋變周之文從殷之質合  
伯子男以為一者案公羊傳相十一年九月鄭忽出奔衛  
忽何以名春秋伯子男一也辭無所貶何休云春秋改周  
之文從殷之質合伯子男為一一辭無所貶皆從子春秋  
之時伯亦得稱子子亦得稱伯今鄭是伯爵忽若稱子與  
成君無異則不見在喪之降貶故在喪降而稱名非為貶  
責稱名故云辭無所貶何休之意合伯子男為一皆從稱  
子也鄭康成此注之意合伯子男以為一皆稱伯也與何

休不同故鄭云躬爵三等者公侯伯也若躬家夷狄之君大者亦稱伯故書序云巢伯來朝注云伯爵也南方遠國云則躬爵三等者公侯伯也者則公百里侯七十里伯五十里也云異畿內謂之子者畿外既有公侯伯標異畿內特謂之子爵雖為子若作三公則受百里之地若作卿則受七十里之地若作大夫則受五十里之地躬家雖因於夏畿內之制與夏不同夏之畿內國皆方五十里故鄭注尚書萬國之數云四百國在畿內是皆五十里躬之畿內據下文有百里之國九七十里之國二十有一五十里之國六十有三凡九十三國是與夏不同也張逸問躬爵三等公侯伯尚書有微子箕子何鄭答云微子箕子實是畿內采地之爵非畿外治民之君故云子也云周武王初定天下更立五等之爵增以子男者案尚書武成云列爵惟五分土惟三既云列爵惟五故知增以子男也云而猶因躬之地以九州之界尚狹也者解所以列爵既五則應五等之士上公五百里以下猶因躬之地公侯百里伯七十七

里子男五十里為三等以雖伐紂九州之地尚隘狹未得五等之封故也云周公攝政致大平斥大九州之界制禮成武王之意者斥大謂開斥廣大於先中國方三千里今方七千是斥大九州之界也武王既列爵惟五是意欲為五等之封但為界狹今周公為五等之封是成武王之意云諸侯大者地方五百里以下皆大司徒職文云所因躬之所因躬之諸侯既無大罪不可以絕滅亦如周之諸侯以勳多少黜退之升陟之躬之諸侯大者百里今日有功則升陟或二百里或三百里是陟之也云黜者謂於周家有過諸侯黨紂為惡者皆黜退之不復得為諸侯或黜滅至七十五十里或有罪黜為附庸也云其不合者皆益之地為百里焉謂其不以功過黜陟者謂平常諸侯皆益之地使滿百里焉云周世有爵尊而國小爵卑而國大者張逸疑而不解以問於鄭鄭答之云設今有五十里之國於此無功可進無過可退亦就益其地為百里之國爵尊而國

小者若虞號之君爵為公地方百里爵卑而國大者侯四百里伯三百里子男二百里皆大於虞號鄭通言男亦二百里者據男有功得附庸者言之耳大於虞號百里之意云唯天子畿內不增以祿羣臣不主為治民者解畿外之地公侯伯子男皆增其地今畿內公卿大夫采地不增益之者本以祿賜羣臣不須增益其地以其不主為治民故也外土諸侯本為治民須便民利國故須增益其封周之畿內有百里之國有五十里之國有二十五里之國鄭注小司徒云百里之國凡四都五十里之國凡四縣二十五里之國凡四甸故崔氏云畿內有百里之國有五十里之國有二十五里之國元命包云周爵五等法五情春秋三等象三光說者因此以為文家爵五等質家爵三等若然夏家文應五等虞家質應三等案虞書輯五瑞修五禮五玉崑復三等乎又禮緯含文嘉云殷爵三等殷正尚白白者兼正中故三等夏尚黑亦從三等案孝經夏制而云公侯伯子男是不為三等也含文嘉之文又不可用也

農田百畝百畝之分上農夫食九人其

次食八人其次食七人其次食六人下

農夫食五人庶人在官者其祿以是為

差也農夫皆受田於公田肥墾有五等收入不同也庶人在官謂府史之屬官長所除不命於天子國君

者分或為糞諸侯之下士視上農夫祿足以代

其耕也中士倍下士上士倍中士下大

夫倍上士卿四大夫祿君十卿祿次國

之卿三大夫祿君十卿祿小國之卿倍

大夫祿君十卿祿

此班祿尊卑之差

**疏**

正義曰此一節論制農田有上

中下以祿庶人在官及士大夫并卿及君之祿各隨文解之。  
**注**農夫至為糞。正義曰農夫皆受田於公者以經云制農田是王者制度授農以田是農夫受田於公也云肥墩有五等收入不同也者案周禮地有九等故司徒上地家七人中地家六人下地家五人注云有夫有婦然後為家自二人以至於十人為九等一家男女七人以上則授之以上地所養者眾也男女五人以下則授之以下地所養者寡也正以七人六人五人為率者舉中而言如鄭此言上地家七人者為中地之上家六人者謂中地之中家五人者謂中地之下此推之下地之上家四人下地之中家三人下地之下家二人則上地之上家十人上地之中家九人上地之下家八人是則有九等從十人而以至於二人此經地唯五等自九人而下至五人不同者大司徒所云農夫授田實有九等此據準庶人在官之祿最下

者猶五人故從上農夫至五人而已司徒上地家十人比云上農夫食九人者謂上中之地亦為上地即上農夫不言上上者欲取九人當下士祿亦與司徒不異也既有九等案大司徒不易之地家百晦一易之地家二百晦再易之地家三百晦地唯有三等者大司徒言其大綱其實不易一易再易各為三等則九等也案異義左氏說山林之地九夫為度九度而當一井藪澤之地九夫為鳩八鳩當一井京陵之地九夫為辨七辨而當一井淳鹵之地九夫為表六表而當一井疆潦之地九夫為藪五藪而當一井偃豬之地九夫為規四規而當一井原防之地九夫為町三町而當一井隰臯之地九夫為牧二牧而當一井衍沃之地九夫為井賦法積四十五井除山川坑岸三十六井定出賦者九井則千里之畿地方百萬井除山川坑岸三十六萬井定出賦者六十四萬井長轂萬乘如異義此說則方十里凡百井三十六井為山川坑岸六十四井為平地出稅案鄭注小司徒成方十里緣邊一里治為溝洫則



三十六井其餘方八里爲甸六十四井出田稅與異義不同者異義所云通山林藪澤九等而言之鄭注小司徒者據行沃平地而言之所以不同也異義九等者據大略國中有山林至衍沃之等言之周禮九等者據授民地肥瘠有九等與異義不同也尚書禹貢注云一井上上出九夫稅上中出八夫稅上下出七夫稅中上出六夫稅中中出五夫稅中下出四夫稅下上出三夫稅下中出二夫稅下下出一夫稅所以又有此九等者以禹貢九州有上中下九等出沒不同故以井田計之以一州當一井假令冀州上上出九百萬夫之稅兗州下下出一百萬夫之稅是九州大較相比如此非謂冀州之民皆出上上兗州之民皆出下下與周禮九等又不同也所以上農夫得食九人者以史記云上地畝一鍾鍾六斛四斗百畝百鍾則六百四十斛案食貨志又云上軌其收自四斛則百畝四百斛也案廩人中歲人食三鬴其九人之内老幼相通不皆人食三鬴故食九人也其民之常稅不過什一又庶民喪祭費用

又少且年有豐儉不恒上孰崔氏以爲畝皆一鍾人恒食四鬴又爲什二而稅又云祭用數之仞者苟欲計算使合其義非也云庶人在官謂府史之屬者則周禮大宰云府六人史十有二人云之屬謂工人賈人及胥徒也云官長所除不命於天子國君者官長謂冢宰爲天官之長司徒爲地官之長自所命或若大府爲府藏官之長大司樂爲樂官之長是也言所除者謂所命之官除去其舊名籍周禮注云凡府史以下官長所自辟除以其非九命之内故知不命於天子國君也若子男之士雖無命亦當命於國君也以其稱士故也 此班祿尊卑之差 正義曰經云下士視上農夫祿足以代其耕也則庶人在官者雖食八人以下不得代耕故載師有官田謂庶人在官之田大夫以下位卑祿少故大小國不殊卿與君祿重位尊故祿隨國之大小爲節按周禮天子卿大夫士與諸侯之臣執贄同則祿亦同也此自下士至小國之卿倍大夫祿皆據無采地者言之故鄭荅臨頌云王畿方千里者凡九百萬夫

之地三分去一定受田者三百萬夫出都家之田以其餘地之稅祿無田者下士食九人中士食十八人上士三十六人下大夫七十二人中大夫次國之上卿位當百四十四人卿二百八十八人

大國之中中當其下下當其上大夫小

國之上卿位當大國之下卿中當其上

大夫下當其下大夫 此諸侯使卿大夫規聘並會之序也其位爵同小國

在下爵異固在上耳 其有中士下士者數各居其上

之三分 謂其為介若特行而並會也居猶當也此據大國而言大國之士為上次國之士為中小國之士為下士之數國皆二十七人各三分之上九中九下九以位相當則次國之上士當大國之中中當其下小國之

上士當大國之下凡非命士亦無出會之事春秋傳謂士為微

**疏** 正義曰此一節論諸侯使卿大夫士規聘

班序行列之法各隨文解之 注此諸至上耳 正義曰

經文既稱大國小國大小並在則非是特來故知使卿大夫規聘並會也云其位爵同小國在下者爵同謂同作卿也據經文小國卑於大國故知小國之卿在大國之卿下

云爵異固在上耳者謂大國是大夫小國是卿則經云小國之卿位當大國之上大夫是小國之卿爵異於大國之

大夫其爵既異固當在大夫之上必知爵異小國在上者以其卿執羔大夫執鴈又卿絺冕大夫玄冕故知小國之

卿不得在大國大夫之下也 其有至三分 中士者謂次國之士下士者謂小國之士大國之士既分為三分次

國小國之士亦分為三分今大國之士既在朝會若其有中

國之士小國之士者其行位之數各居其上國之三分之二謂次國以大國為上而次國上九當大國中九次國中九當大國下九是當其大國之三分之二小國以次國

為上小國上九當次國中九小國中九當次國下九亦是居上三分之二也是各居上之三分

正義曰言謂其為介者若聘禮士介四人是也若特行則隱元年及宋人盟於宿是也本國出使是行至他國與諸國並會也云此據大國而言者以經必云中士下士不云上士是文以大國為主以中國下國來當之故知據大國而言云大國之士為上次國之士為中小國之士為下者解經之中士為中國之士下士為下國之士經雖無上士之文以中士下士類之則上士為大國之士也就上士中士下士之內各分為上九中九下九言大國之士為上不解經之上字者自謂次國以大國為上小國以次國為上耳云

凡非命士亦無出會之事者即祭法庶士是也云春秋傳謂士為微者隱元年及宋人盟於宿公羊傳云孰及之內之微者也是謂士為微也

**凡四海之內**

**九州州方千里州建百里之國三十七十里**

**之國六十五十里之國百有二十凡二百一十**

**國名山大澤不以封其餘以為附庸間田八**

**州州二百一十國**

建立也立大國三十三公也立次國六十六卿也立小國百二十

亦賦稅之而已此大界方三千里三三而九方千里者九

也其一為縣內餘八各立一州此殷制也周公制禮九州

大界方七千里七七四十九方千里者四十有九也其一

為畿內餘四十八八州各有方千里者六設法一州封地

方五百里者不過四謂之大國又封方四百里者不過六

又封方三百里者不過十一謂之次國又封方二百里者

不過二十五及餘方百里者謂之小國盈上四等之數并

四十六一州二百一十國則餘方百里者百六十四也凡

處地方千里者五方百里者五十九其餘方百里者四十

凡

一附庸

**疏**

正義曰此一節論四海之內九州州別建國地也

多少及附庸間田之法如鄭所注此經云是  
殷法也周禮則九服夷鎮蕃三服謂之四海四海之內謂  
要服以內殷則服數無文則必不與周同案爾雅釋地云  
九夷八狄七戎六蠻謂之四海孫炎云海之言晦晦闇於  
禮義此言四海之內謂夷狄之內也地方三千里以開方  
計之三三如九方千里者有九其一為天子縣內下文具  
之以外八州州別方千里者有一州建百里之國三十是  
公國也七十里之國六十是侯國也五十里之國百有二  
十是伯國也是一州凡二百一十國必二百一十國者案  
元命包云陽成於三列於七三七十二一故二百一十國  
也其餘以為附庸間田謂置二百一十國外之餘地為附  
庸間田也若封人附於大國謂之附庸若未封人謂之間  
田每州二百一十國所餘之地者則下文云方百里者十  
方十里者六十是也 **疏** 建立至地也 正義曰建是樹  
立之義故建為立也云立大國三十三公也者鄭以天

子縣內三公之國亦百里今畿外大國亦百里是準擬畿  
內三公之地故云十三公也每十箇國則準一公是三十  
國準於三公也云立次國六十六卿也者亦以畿內六  
卿之地方七十里今畿外次國亦七十里故知準擬六卿  
六十也通一孤則謂之九卿據有職事者言之故為六卿  
也云立小國百二十二小卿也者小卿則天子畿內大  
夫國方五十里今畿外小國亦五十里是準擬大夫當十  
於十二小卿也定本云十二小卿重有十字俗本直云  
十二小卿俗本誤也云名山大澤不以封者與民同財者  
若封諸侯則諸侯為主民不得取其財物故不封諸侯使  
民共取故山虞職云令萬民時斬材有期日是也云不得  
障管亦賦稅之而已者既不封諸侯其諸侯不得障塞管  
領禁民取物民既取物隨其所取賦稅而已故澤虞云使  
其地之人守其財物以時入之于玉府是也定本云不得  
不管亦賦稅而已謂雖不封諸侯諸侯不得不管若如此  
解則於而已二字為妨恐定本誤也云此殷制也者以夏

時萬國則地餘三千里周又中國方七千里今大界三千  
非夏非周故云殷制也其實夏之末年亦與殷同方三千  
里故下云天子之縣內鄭注云縣內夏時天子所居州界  
名也又云夏末既衰夷狄內侵土地減國數少是也云周  
公制禮九州大界方七千里者案大行人邦畿方千里其  
外方五百里謂之侯服甸服男服采服衛服要服服五百  
里通王畿四面相距為七千里大行人要服已外即云九  
州之外謂之蕃國是要服以內為中國也云設法一州封  
地方五百里者不過四者言設法謂假設為法非實封也  
故職方云千里封公以方五百里則四公注云每事言則  
者設法也是不實封必知不實封者以每州有四公八州  
則三十二公周之上公則唯杞宋耳故知非實封也一州  
有千里之方六則一箇千里之方為方百里者百一箇五  
百里之國為方百里者二十五箇二十五用千里之方  
一是一方五百里者不過四也云又封方四百里者不過六  
皆以一箇四百里之國為方百里者一十六六箇一十六

為九十六是用百里之方九十六為六箇四百里之國故  
云方四百里者不過六用千里之方一猶餘百里之方四  
云又封方三百里者不過十一者以一箇三百里之國為  
方百里者九十一箇九為九十九是用百里之方九十九故云  
封方三百里者不過十一用千里之方一猶餘百里之方  
一云又封方二百里者不過二十五者以一箇二百里之  
國為方百里者四十二五箇二百里國用千里之方一故  
云封方二百里者不過二十五云盈上四等之數者謂將  
此百里小國一百六十四添盈公侯伯子四等之數四十  
六則為一州二百一十國也云則餘方百里者百六十四  
也者以其上唯云餘方百里者謂之小國不顯其數多少  
直言盈上四等之數四等既有四十六若添滿二百一十  
必須百六十四故云方百里者百六十四也云凡處地方  
千里者五方百里者五十九者封公則四是用千里之方  
一封侯則六又用千里之方一封伯十一又用千里之方  
一封子二十五又用千里之方一封男百又用千里之方

神言義一五  
一是處地方千里者五男國更須六十四則應須百里之方六十四但千里之方六封侯之外猶餘百里之方四千里之方封伯十一之外猶餘百里之方一是五箇千里之方內揔餘百里之方五得為五箇男國則五箇千里之方外更得五十九箇百里之方是滿六十四也云其餘方百里者四十一附庸地也者以百里之方百去其五十九故餘四十一也案鄭注大司徒云侯附庸九同伯附庸七同子附庸五同男附庸三同今一州唯有方百里者四十一得備侯伯子男二百一十國附庸者鄭注司徒云凡諸侯為牧正帥長及有德者乃有附庸非國國皆有且此云州別二百一十國及侯附庸九同皆設法而言非實事也注侯附庸九同者諸侯有功可進為公為四百里之上加九同得進為五百里也伯於三百之上加七同得為四百里進為侯也子於二百里之上加五同得為三百里進為伯也男於百里之上加三同得為二百里進為子也言同者謂積累眾附庸而滿同也非謂一附庸居一同也鄭注司

徒云公無附庸以其尊極故又鄭云魯以周公之故得兼四等加二十四附庸方七百里也 天子之

縣內方百里之國九七十里之國二十有一五十里之國六十有三凡九十三國名

山大澤不以盼其餘以祿士以為間田縣內夏時

天子所居州界名也邦曰畿詩邦頌曰邦畿千里維民所止周亦曰畿畿內大國九者三公之田三為有致仕者副之為六也其餘三待封王之子弟次國二十一者卿之田六亦為有致仕者副之為十二又三為三孤之田其餘六亦待封王之子弟小國六十三大夫之田二十七亦為有致仕者副之為五十四其餘九亦以待封王之子弟三孤之田不副者以其無職佐公論道耳正義曰此經明雖其致仕猶可即而謀焉盼讀為班 疏 天子縣內之國

數多少及祿士之法案殷之與周稱畿唐虞稱服無云縣者今此特云縣內故鄭云夏時天子所居州界名也案鄭注益稷云禹會諸侯於塗山執玉帛者萬國四百國在畿內今此畿內唯有九十三國者蓋夏之一代畿內稱縣當夏禹之初有四百國至夏之末土地既滅故與禹世不同未知於時縣內國數多少湯承夏末之後制為九十三國記者言縣明其承夏之餘國數是殷湯之制故與四百國不同也 名山大澤不以盼者畿外列土諸侯有封建之義故云不以封畿內之臣既不世位有盼賜之義故云不以盼所以不盼者亦為與民共財不障管也雖不障民取其財物亦入之王府即周禮山虞澤虞所掌是也其餘以祿士以為間田者謂九十三國之餘則下文云其餘方百里者六十四方十里者九十六是也以九十三國以封公卿大夫故特云以祿士其實公卿之子父死之後既不世爵得食父祿故下文云大夫不世爵未賜爵視天子之元士以君其國是九十三國之外既云視元士則此祿士包之

也其不封公卿大夫及祿士之外並為間田則周禮云公邑也不云附庸者以縣內無附庸也所以畿外州建二百一十國之外則間田少畿內立九十三國之外間田多者以畿外諸侯有大功德始有附庸故間田少畿內每須盼賜故間田多依周禮間田自二百里之外以至五百里其大夫則於三百里為采地卿則於四百里為采地公則於五百里為采地故載師云以公邑之田任甸地以家邑之田任稍地以小都之田任縣地以大都之田任甸地是也未知殷制如何其周之畿內采邑大小未聞則鄭注小司徒云百里之國凡四都五十里之國凡四縣二十五里之國凡四甸是謂畿內大國百里次國五十里小國二十五里又注大司徒云畿內之制未聞是知疑而不定此云祿士謂無地之士給之以地而當其祿不得為采邑耳其實春秋之時公卿亦有無地者故春秋經劉子單子是地者稱爵王子虎卒是無地者不稱爵也 注詩殷至謀焉正義曰引詩殷頌者是玄鳥祀高宗之篇證殷稱畿也

云周亦曰畿者周禮職方云千里曰王畿是也云為有致仕者副之者以三公在朝既有正田今身既致仕不可仍食三公采邑身又見存不可全無其地故公卿大夫皆有正職之田又有致仕副邑云其餘三待封王之子弟者禮運云天子有田以處其子孫又周禮有郡宗人家宗人祭祀皆致福於王是有封王之子弟也但王之子弟有同母異母有親疏之異親寵者封之與三公同平常者與六卿同疏遠者與大夫同故有三等之差也云三孤之田不副者自上差之三公之外其餘有三卿之外其餘有六大夫之外其餘有九皆以次相三若三孤有致仕之副則卿與公同其餘三非差次也云以其無職佐公論道耳雖其致仕猶可耳而謀焉者案周禮三公雖無正職猶列於官參六卿之事故司徒云鄉老二鄉則公一人三孤則不列於官故云無職但佐公論道在朝在家其事一等雖退致仕猶可就而謀事不須致仕之後朝上更別立官故知不有致仕之副

### 凡九州千七百七十

### 三國天子之元士諸侯之附庸不與

不與不在數中

也春秋傳曰禹會諸侯於塗山執玉帛者萬國言執玉帛則是唯謂中國耳中國而言萬國則是諸侯之地有方百里者有方七十里者有方五十里者禹承堯舜而然矣要服之內地方七千里乃能容之夏末既衰夷狄內侵諸侯相并上地減國數少殷湯承之更制中國方三千里之界亦分為九州而建此千七百七十三國焉周公復唐虞之舊域分其五服為九其要服之內亦方七千里而因殷諸侯之數廣其土增其爵耳孝經說曰周千八百諸侯布列五千里內此文改周之法關盛衰之中三七之間以為說也終此說之意五五二十五方千里者二十五也其一為畿內餘二十四州各有方千里者三

**疏**

正義曰此一節總明殷之畿內畿外

其餘諸侯之地大小則未得而聞國數之法前文云凡四海之內明殷之畿外諸侯次經明天子縣內殷之畿內國數此經總明殷之畿內畿外故云



凡九州千七百七十三國天子之元士諸侯之附庸不在數中故云不與商王大計地方三千里畿外八州每一州二百一十國封爵三等八州一千六百八十國并王畿內九十三國計千七百七十三國天子之元士則下云方百里者六十四方十里者九十六是天子之元士又下云其餘方百里者十方十里者六十是諸侯附庸不在千七百七十三之數 注春秋至而聞 正義曰引春秋傳者哀七年左傳文時魯欲伐邾孟孫不欲諸大夫答孟孫云禹會諸侯於塗山執玉帛者萬國今其存者無數十焉又襄二十五年傳云若無侵小何以至焉杜預云塗山在壽春東北與會稽別也若鄭康成之意塗山則會稽也故注尚書云禹朝羣臣於會稽執玉帛者萬國是以張逸疑而問鄭家左傳禹會諸侯於塗山執玉帛者萬國外傳云禹朝羣臣於會稽防風氏後至不與注相應何鄭答云欲明諸侯守土之祀故兼用外傳內傳語者鄭意以塗山會稽為一以諸侯為守土之祀故云禹朝羣臣羣臣則諸侯也鄭

云兼用外傳內傳語者禹朝羣臣於會稽是外傳語執玉帛者萬國是內傳左氏語云言執玉帛則是唯謂中國耳者案觀禮諸侯享王璧以帛是執玉帛也案大行人侯甸男采衛要各以其服貢物下云九州之外謂之蕃國各以其所貴寶為摯鄭注貴寶若白狼白鹿夷狄不執玉帛故云執玉帛唯謂中國耳云中國而言萬國則是諸侯之地有方百里有方七十里者鄭言此者以周之大國方五百里而下則不得有萬國故云然也案萬國之數鄭注臯陶謨堯初制五服更五百里禹所弼每服五百里故始有百里之封焉猶用要服之內為九州州立十二人為諸侯師蓋百國一師則州十有二師則每州千二百國也八州九千六百國其餘四百國在畿內鄭又云百里者三封國七有奇所以百里三封國七者以百里之方一為公侯之國一又以百里之方一為伯七十里之國二又以百里之方一為子男五十里之國四是百里之方三封國七也言有奇者謂百里之方一封七十里之國二有奇

者以百里之方一為十里之方百七十里之國一用十里之方四十九七十里之國二用十里之方九十八餘有十里之方二故云有奇以此計之州有千里之方六以千里之國四百有奇又以千里之方二為子男五十里之國八百摠為一千四百國以二百國及奇餘為附庸山澤故州有千二百國鄭云四百國在畿內者以大略據子男為言非實法也趙商不達鄭旨而問鄭云以王制論之畿內之國有百里有七十里有五十里今率以下等計之又王城關遂郊郭卿大夫之采地數不在中今就四百似頗不合鄭答之云二代異物王制之法唐虞或不盡然堯舜之德守在四疆鄉遂有無無以言也公卿大夫有田祿者其四百國非采地為何王城之大郊關之處幾何而子責急也此鄭亦隨問而答非事實也必知非實者以地形不可方平如圖又有山不封之地何有同積基無空缺之處故知略計地為四百國耳云禹承堯舜而然矣者以堯未遭洪

水之前帝德寬遠不制以法故中國五千禹因治水之後德化漸大故中國更廣而有萬國云要服之內地方七千里乃能容之者王畿內五百里又五百里外侯服去城外五百里是一千里又五百里甸服是一千五百里又五百里男服是二千里又五百里采服是二千五百里又五百里衛服是三千五百里又五百里為要服是三千五百里要服去王城三千五百里四面相距為七千里是九州之內此云要服之內地方七千里也案尚書咎繇注禹弼成五服去王城五百里曰甸服其弼當侯服去王城千里其外五百里為侯服當甸服去王城一千五百里其弼當男服去王城二千里又其外五百里為綏服當采服去王城二千五百里其弼當衛服去王城三千五百里又其外五百里為要服與周要服相當去王城三千五百里四面相距為七千里是九州之內也故此云要服之內地方七千里咎繇注又云要服之弼當其夷服去王城當四千里又其外五百里曰荒服當鎮服其弼當蕃服去王城五千里四面相距

爲方萬里也云夏末既衰夷狄內侵諸侯相并土地減國數少者以湯承於夏末中國唯方三千里明所因有漸承夏未之地上云天子縣內是夏末初其界相似也必知此王制之文以爲勢制者正以百里七十里五十里之國與周不同又千七百七十三國與禹萬國數復異又虞夏及周皆曰牧此經稱伯故知大略皆據勢而言也其天子七廟及下雜論虞夏商周四代之制亦兼載焉云周公復唐虞之舊域分其五服爲九其要服之內亦方七千里者言復唐虞舊域謂治水之後舊域也案周禮職方云方千里曰王畿其外方五百里曰侯服又其外方五百里曰甸服又其外方五百里曰男服又其外方五百里曰采服又其外方五百里曰衛服又其外方五百里曰蠻服又其外方五百里曰夷服又其外方五百里曰鎮服又其外方五百里曰藩服蠻服則要服是分其五服爲九以要服之內方七千里也云因殷諸侯之數廣其土增其爵耳者案洛誥傳云天下諸侯之來進受命於周退見文武尸者千七百七十

三諸侯其數與此同是周因殷諸侯之數也案大司徒公五百里侯四百里與此公侯百里不同是廣其土也殷爵三等周爵五等是增其爵耳云孝經說曰周千八百諸侯布列五千里內者此孝經緯文云千八百者舉成數其實亦千七百七十三諸侯也布列在中國五千里之內云此文改周之法關盛衰之中三七之間以爲說也者此文謂此孝經緯文改周之法謂改周公盛時之法盛謂地方七千里衰謂地方三千里故云關盛衰之中三七之間若指文言之盛謂周公制禮太平時也衰謂夏末殷初之時也盛衰之中謂武王時也若以當代言之衰謂周末幽厲之時與夏末同盛衰之中謂昭王恭王之時與武王同云終此說之意者謂終竟此孝經緯所說之意云其餘諸侯之地大小則未得而聞者謂一州之內千里之方有三而一州建二百一十國但未知國之大小及封建制度故云未聞異義公羊說殷三千諸侯周千八百諸侯古春秋左氏傳說禹會諸侯於塗山執玉帛者萬國唐虞之地萬里容

百里地萬國其侯伯七十里子男五十里餘為天子間田許慎謹案易曰萬國咸寧尚書云協和萬邦從左氏說鄭駁之云而諸侯多少異世不同萬國者謂唐虞之制也武王伐紂三分有二八百諸侯則殷末諸侯千二百也至周公制禮之後準王制千七百七十三國而言周千八百者舉其全數又異義今尚書歐陽夏侯說中國方五千里古尚書說五服旁五千里相距萬里許慎謹案以今漢地考之自黑水至東海衡山之陽至於朔方經略萬里從古尚書說鄭氏無駁與許同案易下繫云一君二民君子之道二君一民小人之道鄭注一君二民謂黃帝堯舜謂地方萬里為方千里者百中國之民居七千里七七四十九方千里者四十九夷狄之民居千里者五十一是中國夷狄二民共事一君二君一民謂三代之末以地方五千里一君有五千里之上五五二十五更足以一君二十五始滿千里之方五十乃當堯舜一民之地故云二君一民實無此二君一民假之以地廣狹為優劣也

天子百

里之內以共官千里之內以為御

謂此地之田稅所給也官

謂其文書財用也御謂衣食

**疏**

正義曰此一節論畿內千里之地田稅所共給之事

謂此至衣食

正義曰經云百里之內者謂去王城百里四面相距則二百里經云千里之內以為御者謂四面相距為千里去王城四面五百里二者相互云此地之田稅所給也者依周禮有口率出泉恐此是口率之泉故云此地之田稅所給也知非口率出泉所給者案周禮大府九賦之泉各有所給故其職云關市之賦以待王之膳服邦中之賦以待賓客四郊之賦以待稍秣家削之賦以待匪頒邦甸之賦以待王事邦縣之賦以待幣帛邦都之賦以待祭祀山澤之賦以待喪紀幣餘之賦以待賜予是口率出泉各有所用也知官謂其文書財用也者以其稱官是官府所須故為文書財用御是進御所須故為衣食但官是早褻故用近物御為尊重故用遠物此為殷法也但未知有口率出泉以

否千里之外設方伯五國以為屬屬有長

十國以為連連有帥三十國以為卒卒有

正二百一十國以為州州有伯屬連卒州猶聚也伯帥正亦長

也凡長皆因賢侯為之殷之八州八伯五十六正百

六十八帥三百三十六長八伯各以其屬屬

於天子之老二人分天下以為左右曰二伯

老謂上公周禮曰九命作伯春秋傳曰自疏正義曰此

陝以東周公主之自陝以西召公主之一節論千

里之外設方伯及連帥卒正兼二伯之事各隨文解之

注屬連至曰牧正義曰屬是繫屬連是連接卒是卒伍

州是聚居故云屬連卒州猶聚也伯帥正俱是長但異其

名云凡長皆因賢侯為之者既長諸侯非賢不可故知賢

侯為之言因者因其州內賢侯非州外別取州牧則知以

賢侯為之故下曲禮以侯為牧周制牧下有二伯則侯伯

皆得為之故詩旄丘責衛伯也衛是侯爵而為州伯張逸

疑而問鄭鄭荅云侯德適任之謂衛侯之德適可任州伯

也然則伯之賢者亦可進為牧故周禮宗伯八命作牧注

云謂侯伯有功德者加命得專征伐是伯得為牧也鄭必

知州牧之下更有二伯者以左傳云五侯九伯服杜皆為

五等諸侯九州之伯鄭荅志云若征五等諸侯九州之伯

何夾輔之有大公為王官伯分主自陝以東不可分為四

侯半故稱五侯四州有八伯畿內有一伯故為九伯也案

鄭志注尚書為八伯張逸問云九州而八伯者何鄭荅云

畿內之州不置伯有鄉遂之吏主之伯即牧也故周禮大

宰云施典于邦國建其牧立其監是畿外邦國有牧畿內

不置也畿內既不置牧則應無牧下之伯而立五侯九伯

畿內有一伯者但比擬畿外應有而言之其實無也州長既用賢侯為之則卒正連帥屬長節級用伯子男賢者而為之鄭注曲禮云二王之後不為牧則邦亦當然邦既亦有連屬卒等則周亦然也故詩旌丘責衛伯不能脩方伯連率之職是也云虞夏及周皆曰牧者案尚書舜典云觀四岳羣牧又云咨十有二牧是虞稱牧也虞雖稱牧亦稱伯故書傳云唯元祀巡此四岳八伯案左傳宣三年云夏之方有德也貢金九牧是夏稱牧也大宰云建其牧是周稱牧也故云虞夏及周皆曰牧

**注**周禮至主之 正義曰九命作伯大宗伯職文春秋傳曰以下春秋隱五年公羊傳文故傳云三公者何天子之相也自陝而東者周公主之自陝而西者召公主之一相處乎內是也

**里之內曰甸**

服治田出穀稅

**千里之外曰采**

九州之內地取其美

物以當穀稅

**曰流**

謂九州之外也夷狄流移或貢或不禹貢荒服之外三百里蠻二百里流



正義曰此一節摠論畿內畿外九州治田及采取美物并九州之外或貢或否之事各隨文解之

**注**服治田出穀稅 正義曰定本直云服治田出穀稅無甸字知甸是服治田出穀稅者案禹貢五百里曰甸服下又云百里賦納

總二百里納銓及秭粟米之等是甸為治田也

**注**九州至穀稅 正義曰經云千里之外曰采謂規方千里之外

若於王城五百里之外以邦制言之中國方三千里而面別去王城千五百里今五百里以為畿內千里之外唯千

里耳采取美物故言曰采周則王畿之外面別三千里采取美物則大行人侯服其貢祀物甸服其貢嬪物男服其貢器物采服其貢服物衛服其貢材物要服其貢貨物是也

**曰流** 正義曰流謂九州之外或貢或否流移不定邦則面別千五百里之外二千五百里之內謂天子之為流周三千五百里之外五千里之內為流也

**三公九卿二十七大夫八十一元士**

此夏制也明堂

位曰夏后氏之官百舉成數也**疏**正義曰此一經論夏天子設公卿大夫元士之數**注**此夏至數也正義曰以周禮其官三百六十此官百二十故云夏制以夏制不明更引明堂位夏后氏之官百以證之直云百不云百二十故云舉成數也王制之文鄭皆以為舛法此獨云夏制者以明堂設官二百與此百二十數下相當故不得云舛制也記者故雜記而言之或舉夏或舉殷也

### 禮記正義卷第十五

### 禮記正義卷第十六

國子祭酒上護軍曲阜縣開國子臣孔穎達等奉

勅撰

大國三卿皆命於天子下大夫五人上士二十七人次國三卿二卿命於天子一卿命於其君下大夫五人上士二十七人小國二卿皆命於其君下大夫五人上士二十七人命於天子者天子選用之如今詔書除吏矣小國亦三卿一卿命於天子二卿命於其君此文

似誤脫耳或者欲見畿內之國二卿與

**疏**

正義曰此一節論夏家天子命諸侯之國卿大夫及士之數前

既云夏官此亦夏禮卿大夫士數五等之國悉同但大國三卿並受命於天子也夏之大國謂公與侯也殷周大國並公也崔氏云三卿者依周制而言謂立司徒兼冢宰之事立司馬兼宗伯之事立司空兼司寇之事故春秋左傳云季孫為司徒叔孫為司馬孟孫為司空此是三卿也以此推之故知諸侯不立冢宰宗伯司寇之官也 下大夫五人者崔氏云三卿命於天子則大夫以下皆其君自命之也三卿則上中下三品而含上下今云下大夫五人者取卿為言耳知大夫有上下者案前云次國之下卿位當大國之上大夫是也何以五人者謂司徒之下置小卿二人一是小宰一是小司徒司空之下亦置二小卿一是小司寇一是小司空也司馬之下唯置一小卿小司馬也故公羊襄十一年作三軍三軍者何三卿也古者上卿下卿上士下士何休云古者諸侯有司徒司空上卿各一下卿

各二司馬事省上下卿各一若有軍事上士相上卿下士相下卿足以為治今襄公乃益司馬故云作三軍踰王制故譏之下卿即大夫也故此云下大夫五人士士二十七人者云上士者對府史之屬也周禮五等國悉三卿五大夫二十七士皆與此同但公國長有四命孤一人故典命云公之孤四命以皮帛眡小國之君其卿三命其大夫再命其士壹命侯伯之卿大夫士亦如之子男之卿再命其大夫壹命其士不命而鄭注再引王制以成彼義當恐周之人數與王制同也且曾子問是明當時周法而云國家五官則五大夫大夫若五則知餘亦不異也且冢宰云施典於邦國設其參傅其伍鄭云參謂卿三人伍謂大夫五人次國三卿二卿命於天子一卿命於其君下大夫五人上士二十七人者次國者夏則伯殷則侯也周則侯伯也而卿大夫士之命及人之數與大國同但一卿其君自命為異也下文備也 小國二卿皆命於其君下大夫五人上士二十七人者小國者殷謂伯夏周同子男也案鄭注



言小國亦三卿差次而言應一卿命於天子二卿命於其君此唯言二卿則似誤也鄭何以得知應三卿案前云小國又有上中下三卿位當大國之下大夫若無三卿何上中下之有乎故知有三卿也案周禮三命受位鄭云謂此列國之卿始有列位於王為王之臣也若三命卿始得列位於王則子男之卿再命不應得一卿命於王而鄭今云一卿命於王者謂子男之卿亦得王命而彼注三命下云列國卿三命者此自據侯伯為言以會彼三命受位者耳

**注**或者欲見畿內之國二卿與正義曰鄭又為一說畿內之國唯置二卿並是其君自命之今記者或欲因子男此文以見畿內之法故捨去

天子使其大夫為三子男一卿命於王者而不言也

### 監監於方伯之國國二人

使佐方伯領諸侯

**疏**

正義曰此一節

論天子遣大夫往監方伯之國州別各置三人之事天子使其大夫者謂使在朝之大夫往監於方伯每一州輒

三人三八二十四人崔氏云此謂殷之方伯皆有三人以輔之佐其伯謂監所領之諸侯也周則於牧下置二伯亦或因殷使大夫為三監故燕禮云設諸公之坐鄭云公孤也大國孤公一人而云諸公者容牧有三監然則天子於州牧之國別置三大夫以輔之其尊卑之差則下文其祿視諸侯之卿其爵視次國之君其祿視諸侯之卿者謂公之孤也故燕禮謂之諸公與公孤同也尚書使管叔蔡叔霍叔為三監者為武庚也與此別也

天子之

### 縣內諸侯祿也

選賢置之於位其國之祿如諸侯不得世

**疏**

正義曰此一經論天

子縣內食采邑諸侯得祿不得繼世之事此言縣內則夏法也言諸侯祿者得采國為祿而不繼世故云祿也故下云大夫不世爵是也此謂畿內公卿大夫之子父死之後得食父之故國采邑之地不得繼父為公卿大夫也故經直云祿也則子孫恒得食之有罪乃奪之此云諸侯下云大夫不世爵則諸侯摠據大夫以上而司裘諸侯則共熊

侯豹侯鄭注云諸侯謂三公及王子弟鄭唯據三公及王子弟者以下別云卿大夫則共麋侯故諸侯唯止三公及王子弟而已此父死子祿者不在九十三國之數此雖論夏法殷周亦然畿內諸侯父死視元士若有賢德乃復父位若畿外諸侯父死未賜爵亦視元士除服則得襲父故位故下文云未賜爵視天子元士以君其國注云列國及縣內之國也必知列國未賜爵亦視元士者以詩云韎韐有奭以作六師是諸侯世子未爵命服士之韎韐之服是也

**外諸侯嗣也**  
有功乃封之使之世也冠禮記曰繼世以立諸侯象賢也

**疏**  
正義

曰此一經論外諸侯父死子得嗣位之事此畿外諸侯世世象賢傳嗣其國也故下云諸侯世子世國所以畿內諸侯不世爵而畿外得世者以畿內諸侯則公卿大夫輔佐於王非賢不可故不世也畿外諸侯嘗有大功報其勞効又在外少事故得世也異義案公羊穀梁說云卿大夫世則權并一姓妨塞賢路經譏尹氏崔氏是也古春秋左氏

說卿大夫得世祿不世位父為大夫死子得食其故采地如有賢才則復父故位許慎謹案易父位三為三公食舊德謂食父故祿尚書云世選爾勞論語云興滅國繼絕世詩云凡周之士不顯亦世孟子云文王之治岐也仕者世祿知周世祿也從左氏義鄭氏無駁與許同殷之大夫亦世祿故祭義云殷人貴富而尚齒注云臣能世祿曰富是也其諸侯之大夫則下文云不世爵祿謂殷禮也若周制諸侯之大夫有功者亦得世祿故隱公八年無駁卒左傳云官有世功則有官族論語云管氏奪伯氏駢邑三百以無功而奪之若有功則不奪也

**制三公一**

**命卷若有加則賜也不過九命次國之君**

**不過七命小國之君不過五命**  
卷俗讀也其通則曰袞三

公八命矣復加一命則服龍袞與王者之後同多於此則賜非命服也虞夏之制天子服有日月星辰周禮曰諸公

之服自袞冕而下如王之服

**疏**

正義曰此一經論王制三公已下次國小國之君爵命之數制謂王者制

度言王者制度三公八命身著鷩冕若加一命則爲上公與王者之後齊同而著袞冕故云一命卷若有加則賜也者謂九命卷龍之外依制不合有其服若有加益者則是君之特賜非禮法之常也則雜記謂之褻衣也此則禮緯九賜之衣服也與宗伯再命受服不同此篇之作皆是王者之制而於此特言制者以三公位尊又加一命其事極重記者以其重故特云制也 不過九命不過七命不過五命者此謂夏殷之制也亦與周同 **注**卷俗至之服正義曰禮記文皆作卷字是記者承俗人之言故云卷俗讀也云其通則曰袞者謂以通理正法言之則曰袞故周禮司服及覲禮皆作袞是禮之正經也故云其通則曰袞云 虞夏之制天子服有日月星辰者以此經雖以殷爲主亦雜記虞夏之事故鄭引虞夏之制言之案有虞氏望而祭之下注云夏殷未聞此云虞夏之制天子服有日月

星辰者此云特謂虞舜與禹相接事相關穿故尚書堯舜禹之書謂之虞夏書伏生書傳有虞夏傳以皐陶謨云予欲觀古人之象皐陶謨是虞夏之書故云虞夏之制其實虞也下文有虞夏殷周四代並陳故云夏殷未聞也云周禮曰諸公之服自袞冕而下如王之服者是司服文引之者證三公一命袞然則此經三公一命袞謂周制也故以周制解之若周以前則山在袞上不得云一命袞也衣服之制歷代不同案易繫辭云黃帝堯舜垂衣裳而天下治蓋取諸乾坤玄衣法天黃裳法地故易坤六五黃裳元吉是也衣裳從黃帝以來而有也虞氏以來其裳用纁故下文歷陳虞夏殷周注云其服皆玄上纁下裳用纁者鄭注易下繫辭云土託位南方南方色赤黃而兼赤故爲纁也案禮祭地牲玉用黃以放地色裳既法地而用纁者凡衣服著其身有章采文物以黃色太質故用纁也衣爲天色玄禮天牲玉用蒼者以天色畫則蒼夜則玄衣不用蒼赤以其大質故也然祭天亦有牲用玄者尚書及論語云敢

用立牡敢昭告于皇皇后帝是也虞夏之制天子祭服自日月而下十有二章故尚書臯陶云予欲觀古人之象日月星辰山龍華蟲作會宗彝藻火粉米黼黻絺繡是也日一也月二也星辰三也山四也龍五也華蟲六也此六者皆畫於衣故言作會以法於天其數六者法天之陽氣之六律也宗彝七也藻八也火九也粉米十也黼十一也黻十二也此六者皆繡於裳故云絺繡絺絜也謂絜刺以爲繡文以法地之陰氣六呂也案鄭注司服云至周登龍於山登火於宗彝尊其神明也龍取其神火取其明然則諸物各有所象故說日月星辰取其明山者安靜養物畫山者必兼畫山物故考工記云山以章龍者取其神化龍是水物畫龍必兼畫水故考工記云水以龍華蟲者謂雉也取其文采又性能耿介必知華蟲是雉者以周禮差之而當鷩冕故爲雉也雉是鳥類其頸毛及尾似蛇兼有細毛似獸故考工記云鳥獸蛇此六者以高遠在上故畫於衣宗彝者謂宗廟彝尊之飾有虎雉二獸虎有猛雉能辟

害故象之不言虎雉而謂之宗彝者取其美名案周禮有六彝有雞彝鳥彝斝彝尊彝黃彝虎彝雉彝此直云宗彝知非雞彝鳥彝黃必爲虎雉者案明堂位云夏后氏雞彝斝彝以斝周以黃目又周禮陳六尊六彝皆遠代者在後故六尊之次犧象著壺大山大是虞氏之尊山是夏后之尊六彝之次亦虎彝雉彝在後故知虎雉虞夏已飾於尊但舜時已稱宗彝不得有雞斝之等以周禮差之而當鷩冕故知虎雉有毛之物也虎雉淺毛細毳故也藻者取其潔清有文火者取其明照烹飪粉米取其潔白生養黼謂斧也取其決斷之義黻謂兩己相背取其善惡分辨大意取象如此而皇氏乃繁文曲說橫生義例恐非本旨此是天子之服其諸侯以下未得而聞案臯陶謨云五服五章哉鄭注云五服十二也九也七也五也三也如鄭之意九者謂公侯之服自山而下七也是伯之服自華蟲而下五也謂子男之服自藻而下三也卿大夫之服自粉米而下與孝經注不同者孝經舉其大綱或云孝經非鄭注以上所云

舜之制而夏殷注云未聞至周則日月星辰畫於旌旗又  
登龍於山登火於宗彝故注司服云王者相變至周而以  
日月星辰畫於旌旗所謂三辰旂旗昭其明也而冕服九  
章初一日龍次二曰山次三曰華蟲次四曰火次五曰宗  
彝皆畫以爲績六曰藻次七曰粉米次八曰黼次九曰黻  
皆希以爲繡則衮之衣五章裳四章凡九也鷩之衣三章  
裳四章凡七也毳之衣三章裳二章凡五也希之衣一章  
裳二章凡三也玄者衣無文裳刺黻而已是以謂玄焉鄭  
必知日月星辰畫於旌旗者以司服王自衮冕而下則衮  
服最尊尚無日月星辰故知日月星辰不在衣服畫於旌  
旗也知登龍於山者依舊山在龍上若不登龍則衮冕不  
爲最尊故知登龍於山也知登火於宗彝者若不登火則  
五章之服自藻而下不得稱爲毳冕若登火於宗彝之上  
則五章自宗彝而下與毳冕相當然宗彝之下有藻火兩  
章知不登藻而必登火者火有光明之盛春秋傳云火龍  
黻禮記毋火周龍章是火貴於藻也故知登火不登藻

自九章而下以次相差故知衮之衣五章鷩之衣三章  
章緜衣一章衣法天故章數奇裳法地故章數偶以下其  
數漸少則裳上之章漸勝於衣事勢須然非有義意皇氏  
每事曲爲其說恐理非也衣章並畫緜冕之衣獨繡者以  
粉米地物養人服之以祭社稷又地祇並是陰類故衣章  
亦繡也周之衣服既無日月而郊特牲云衮冕日月之章  
者謂魯禮也魯以周公之故衮冕亦日月之章其周之天  
子所用祭服則司服云王祀昊天上帝則服大裘而冕祀  
五帝亦如之享先王則衮冕享先公饗射則鷩冕祀四望  
山川則毳冕祭社稷五祀則希冕祭羣小祀則玄冕鄭司  
農云大裘羔裘也知羔裘者以祭天至質故知羔裘以天  
色玄謂黑羔裘其六冕所祀依冕之先後祭神之尊卑以  
交冕之服華故祭先王以緜冕陰類故祭社稷五祀以玄  
冕質素故祭羣小祀日月雖尊以天神從質故亦玄冕故  
王藻云天子玄端以朝日鄭注云端當爲冕其祭地之服  
無文案詩昊天有成命郊祀天地也天地相對則祭地亦

用六裘故孝經授神契云祭地之禮與祭天同亦據衣服同也又有皮弁以日視朝韋弁以即戎冠弁以田獵故司服云凡兵事韋弁服注云韋弁以韎韋為弁又以為衣裳詩采芑注云韋弁服朱衣裳則韎韋也其事同鄭志又以韋弁為素裳未知孰是司服又云眡朝則皮弁服鄭注云視朝視內外朝之事皮弁之服十五升白布衣積素以為裳王受諸侯朝覲於廟則袞冕其皮弁又以燕諸公故詩云有頍者弁注云弁皮弁詩人責王不以皮弁燕諸公此則朝服燕也又以食故玉藻云皮弁以日視朝遂以食又郊祭之前服之以聽祭報故郊特牲云皮弁以聽祭報又著以舞大夏故明堂位云皮弁素積以舞大夏雖是魯禮王所同之其實射燕射時亦皮弁也知者案射人職賓射在朝故知用朝服也燕禮記云燕朝服於寢明天子燕亦以朝服故知賓射燕射亦皮弁也司服又云凡甸冠弁服注云甸田獵也冠弁委貌其服緇布衣亦積素以為裳王居則玄端此玄端亦緇衣朱裳故玉藻注云天子

請侯玄端朱裳謂之端者已外之服其袂三尺三寸其袪尺八寸其玄端則二尺二寸袪尺二寸端正也以幅廣二尺二寸袂廣二尺二寸與之正方故云玄端也哭諸侯則爵弁故檀弓云天子之哭諸侯也爵弁紵衣爵弁者如爵頭色又有素服凶荒則服之故司服云大札大荒大裁素服其衣服首飾大裘之冕其冕無旒故注弁師云冕服有六而言五冕者大裘之冕蓋無旒不聯數也凡冕之制皆玄上纁下故注弁師云皆玄覆朱裏師說以木版為中以三十升玄布衣之於上謂之延也以朱為裏但不知用布繒耳當應以繒為之以其前後旒用絲故也案漢禮器制度廣八寸長尺六寸也又董巴輿服志云廣七寸長尺二寸皇氏謂此為諸侯之冕應劭漢官儀廣七寸長八寸皇氏以為卿大夫之冕服也若如皇氏言豈董巴專記諸侯應劭專記卿大夫蓋冕隨代變異大小不同今依漢禮器制度為定也今天子五冕之旒皆用五采之絲為旒垂五采之玉故弁師云掌王之五冕五采繅十有二就皆五采

玉十有二鄭注云每就間蓋一寸旒別有五采玉十有二  
衮冕故前後各十一旒用玉二百八十八鷩冕九旒用玉  
二百一十六毳冕七旒用玉一百六十八絺冕五旒用玉  
百二十立冕三旒用玉七十二皮弁縫中亦五采玉十二  
故弁師云玉之皮弁會五采玉璣鄭注云會縫中也縫中  
每貫結五采玉十二以爲飾韋弁亦然故弁師云諸侯及  
孤卿大夫之冕韋弁皮弁弁經各以其等爲之則知天子  
韋弁與皮弁同也其冠弁亦與皮弁同故注弁師云不言  
冠弁冠弁兼於韋弁皮弁矣自此以前皆王者之服祭服  
則以衣名冕象上古先有衣後有冕皮弁以下則以弁名  
衣餘服旣輕舉首爲重故也其諸侯以下則司服云公之  
服自衮冕而下侯伯之服自鷩冕而下子男之服自毳冕  
而下孤之服自希冕而下卿大夫之服自玄冕而下士之  
服自皮弁而下公之衮冕章數與王同其就數則異故鄭  
注禮禮云上公衮無升龍其旒則九不十二也其三公司  
衮文案射人三公執璧與子男同則服毳冕也凡此諸

侯所著之服皆爲助祭於王若助王祭天地及祭先王大  
祀之等皆服已上之服若其從王祭祀小祀雖有應著上  
服皆逐王所著之服不得踰王也自在國祭其先君則皆  
玄冕故玉藻云諸侯玄端以祭鄭云端當爲冕其二王之  
後祭受命之王各服已上之服其自祭餘廟與諸侯同有  
孤之國其孤則絺冕卿大夫玄冕士爵弁此皆謂助君祭  
服也無孤之國卿絺冕大夫玄冕以注玉藻云諸侯之臣  
皆分爲三等其夫卿也則服鞠衣其夫大夫則服禮衣其  
夫士則服祿衣以此言之卿絺冕大夫玄冕士爵弁也此  
服皆謂助祭君也若其自祭則皆降焉諸侯士則玄端大  
夫則朝服故儀禮特牲士祭玄端少牢上大夫祭朝服公  
之孤爵弁以自祭故雜記云大夫冕而祭於公弁而祭於  
己士弁而祭於公冠而祭於己鄭注云爵弁而祭於己唯  
孤爾其天子卿大夫則無文諸侯當玄冕以祭其孤卿之  
等當爵弁也大夫則皮弁知者以諸侯大夫朝服自祭故  
知天子大夫亦用朝服自祭朝服則皮弁故鄭注玉藻云

四命以上齊祭異冠案玉藻云玄冠丹組纓諸侯之齊冠也諸侯既用玄冠而齊則孤卿大夫以下並用玄冠齊也諸侯玄冕而祭天子孤卿及公之孤卿爵弁而祭天子大夫皮弁而祭之皆與齊時玄冠不同故云四命以上齊祭異冠其三命以下玄冠齊玄冠祭是齊祭同冠其諸侯則皮弁以視朝朝服以視朝韋弁以即戎與天子同諸侯田獵亦用韋弁故左傳衛獻公射鴻於囿不釋皮冠而與孫林父言又昭十二年楚子狩於州來皮冠豹舄諸侯又以皮弁受聘享故聘禮公皮弁天子諸侯亦以玄端燕居故玉藻注云天子諸侯玄端朱裳是也諸侯亦以朝服食夕則深衣故玉藻云朝服以食夕深衣祭牢肉又大祥之祭服朝服故喪服小記除成喪者其祭也朝服縞冠大祥以後則麻衣麻衣則白布深衣也但縵之以布耳又有長衣遭喪權時所服故聘禮王主國之喪主人長衣待賓是也其長衣制與深衣同但縵之以素長衣之袂稍長故玉藻注云長衣中衣繼揜尺深衣則縵而已其中衣制如長衣

在上服之自天子以下皆有若祭服中衣用素故詩云衣朱襮其他服中衣用布故玉藻云以帛裏布非禮也其天子卿大夫士以皮弁為朝服諸侯卿大夫士以玄冠縵衣素裳為朝服凡在朝君臣上下同服但士服則謂之玄端袂廣二尺二寸故也其大夫以上則皆侈袂袂三尺三寸故也其大夫以上所論玄端者皆其制與士同其大夫士案玉藻云朝玄端夕深衣其大祥朝服及既祥麻衣並與諸侯同天子祥禫其服無文或亦與諸侯無異其首飾諸侯皆以三采為藻垂三采之玉公衮冕九旒鷩冕七旒毳冕五旒絺冕三旒玄冕蓋無旒旒皆九玉侯伯鷩冕七旒旒以下與公同旒皆七玉子男毳冕五旒以下與公同旒皆五玉若熊氏之義公以下諸冕其旒並依命數不減其章弁皮弁冠弁縫中之玉各依命數玉皆三采朱白蒼也孤絺冕而下其旒及玉皆二采朱綠各依命數其皮弁韋弁冠弁玉亦二采各依其命數其一命大夫玄冕及士則爵弁皆無旒知諸侯以下首飾藻旒玉數如此者案弁師



云諸侯及孤卿大夫之冕韋弁皮弁各以其等為之故鄭注云纁旂玉璫如其命數也冕則侯伯纁七就用玉九十八子男纁五就用玉五十藻玉皆三采孤纁四就用玉三十二二命之卿纁三就用玉十八再命之大夫纁再就用玉八藻玉皆朱綠韋弁皮弁則侯伯璫飾七子男璫飾五玉亦三采孤則璫飾四三命之卿璫飾三再命之大夫璫飾二玉亦二采一命之大夫冕而無旂士變冕為爵弁其韋弁皮弁之會無結飾不言冠弁冠弁兼於韋弁皮弁矣

是大國之卿不過三命下卿再命小國之

卿與下大夫一命 不著次國之卿者以大國之下互明之此卿命則異大夫皆同

周禮公侯伯之卿三命其大夫再命子男之卿再命其大夫一命 正義曰此一節論命數多少不同之事

注不著至一命 正義曰經直云大國之卿及小國之卿不云次國故云不著次國之卿云

以大國之下互明之者以大國之卿不過三命則知次國之卿不過再命大國下卿再命則知次國下卿一命故云互明之云此卿命則異者以大國上卿三命下卿再命次國上卿再命下卿一命小國上下卿並皆一命故云卿命則異云大夫皆同者謂大國次國小國大夫皆同一命今經云小國之卿與下大夫一命既與小國連文知非直據小國下大夫一命者以經云大國下卿再命以次差之明大夫一命自然次國大夫亦一命故云大夫皆同此夏禮制也案周禮云公國之孤四命與餘卿不同則知此大國之卿不過三命亦謂孤也大國下卿再命者謂除孤以外之卿就再命之中分為中卿下卿也故前文云次國之上卿位當大國之中是也次國之卿再命亦謂上卿執政者若魯之季孫下卿一命亦分為中下二等故前文云中當其下下當其上大夫是也小國之卿雖同一命亦分為三等故前文云小國之上卿位當大國之下卿中當其上大夫下當其下大夫其大國次國小國大夫雖同一命當皆

分為上下二等文已具於上今摠云下大夫者對卿言之  
云周禮公侯伯之卿三命以下者皆周禮典命文以經云  
大國之卿不過三命故引公侯伯之卿三命以對  
之周禮公之孤四命不與三命相當故不引之也  
凡官

民材必先論之論謂考其德行道藝論辨然後使之辨

考問得其定也易曰問以辨之任事然後爵之爵謂正其秩次位定然後

祿之與之以常食疏正義曰此一節論擇賢材任以爵祿之事各隨文解之辨謂至辨之

正義曰辨謂考問得其定也者謂官其人必先論量德  
行道藝今論量考問事已分辨得其定實故云辨謂考問  
得其定也引易曰問以辨之是易文言文 任事然後爵

之爵謂正其秩次言雖考問知其實有德行道藝未明其幹能故試任以事事又幹了然後爵人於朝與士

正其秩次除授位定然後與之以祿

共之刑人於市與眾弃之必共之者所以審慎之也書曰克明德慎

罰是故公家不畜刑人大夫弗養士遇之

塗弗與言也屏之四方唯其所之不及以

政亦弗故生也屏猶放去也已施刑則放之弃之役賦不與亦不授之以田困乏又無闕

錄也虞書曰五流有宅五宅三居是也周則墨者使守疏

門劓者使守關宮者使守內刑者使守圜鬣者使守積疏

正義曰此一節論爵人及刑人之事各依文解之 此云  
爵人於朝謂於法也周則天子特假祖廟而拜授之故洛  
誥云烝祭歲文王駢牛一武王駢牛一時冊命周公故特

祭文武若諸侯爵人因嘗祭之日故祭統云祭之日一獻  
君降立于阼階之南南鄉所命北面是也 刑人於市與  
眾弃之者亦謂於法謂貴賤皆刑於市周則有爵者刑於

甸師氏也 是故公家不畜刑人者既與衆弃之以是之  
故天子諸侯之家不畜刑人也大夫不得育養士遇刑人  
於塗弗與言也謂逢遇於塗不與之言 屏之四方唯其  
所之者屏猶放去也謂已施刑暴故放逐弃去使嚮四方  
量其罪之輕重合所之適處而居之既是罪人被放不干  
及以政教之事謂不以王政賦役驅使非但不使意在亦  
不欲使生困乏又無賜餼直放之化外任其自死自生也  
**注** 役賦至守積 正義曰役賦不與謂役賦之事不干  
與於刑人解經不及以政云亦不授之以田困乏又無賜  
餼也者解經亦弗故生也田里所以安其身賜餼所以養  
其命皆是爲生之具今並不與是不故欲使其生也云虞  
書曰五流有宅五宅三居是也者證經屏之四方此云虞  
書者舜典文鄭注云宅讀曰咤懲刈之器謂五刑之流皆  
有器懲刈五咤者是五種之器謂桎一梏二拳二三居謂  
周之夷服鎮服蕃服云周則墨者使守門以下周禮掌  
戮文案掌戮墨者使守門注云黥者無妨於禁御云劓者

使守關注云截鼻亦無妨以貌醜遠之云宮者使守內注  
云以人道絕也云刑者使守囹注云斷足驅衛禽獸無急  
行云髡者使守積注云王之同族不宮之者髡頭而已守  
積積在隱者宜也引之者欲明周家畜刑人異於夏勢法  
也 諸侯之於天子也比年一小聘三年一

大聘五年一朝

比年每歲也小聘使大夫大聘使卿朝則君自行然此大聘與朝晉文霸

時所制也虞夏之制諸侯歲朝周之制侯甸男采衛要服六者各以其服數來朝

天子五年

一巡守

天子以海內爲家時一巡省之五年者虞夏之制也周則十二歲一巡守

**疏**

正義曰此

一經論諸侯遣卿大夫聘問及自親朝之事

注小聘至

來朝

正義曰知小聘使大夫者案聘禮記云小聘曰問

三介大聘使卿爲介有五人其小聘唯三介故知小聘使大夫云此大聘與朝晉文霸時所制也者案昭三年左傳

鄭子大叔曰文襄之霸也其務不煩諸侯今諸侯三歲而聘五歲而朝故云晉文霸時所制而晉文霸時亦應有比年大夫之聘但子大叔略而不言此亦據傳文直云大聘與朝不云比年小聘案左傳文三年聘五年朝諸侯相朝之法今此經文云諸侯之於天子三年一大聘五年一朝則文襄之制諸侯朝天子與自相朝同也如鄭此注唯據文襄故鄭云此晉文霸時所制又鄭駁異義云公羊說比年一小聘三年一大聘五年一朝以為文襄之制錄王制者記文襄之制耳非虞夏及殷法也能氏或以此為虞夏法或以為殷法文義雜亂不復相當曲為解說其義非也云虞夏之制諸侯歲朝者案尚書堯典云五載一巡守羣后四朝鄭注云巡守之年諸侯朝於方岳之下其間四年四方諸侯分來朝於京師歲徧是也案孝經注諸侯五年一朝天子天子亦五年一巡守熊氏以為虞夏制法諸侯歲朝分為四部四年乃徧摠是五年一朝天子乃巡守故云諸侯五年一朝天子天子亦五年一巡守案鄭注尚書

四方諸侯分來朝於京師歲徧則非五年乃徧又孝經之注多與鄭義乖違儒者疑非鄭注今所不取熊氏之說非也虞夏之制但有歲朝之文其諸侯自相朝聘及天子之事則無文不可知也鄭此注虞夏之制即云周之制不云殷者虞夏及周經有明文故指而言之殷則經籍不見故不言也案春秋文十五年左傳云諸侯五年再相朝以脩王命古之制也案鄭志孫皓問云諸侯五年再相朝不知所合典禮鄭荅云古者據時而道前代之言唐虞之禮五載一巡守夏殷之時天子蓋六年一巡守諸侯間而朝天子其不朝者朝罷朝五年再朝似如此制禮典不可得而詳如鄭志之言則夏殷天子六年一巡守其間諸侯分為五部每年一部來朝天子朝罷還國其不朝者朝罷朝諸侯至後年不朝者往朝天子而還前年朝者今既不朝又朝罷朝諸侯是再相朝也故鄭云朝罷朝也如鄭之意此為夏殷之禮而鄭又云虞夏之制諸侯歲朝以夏與虞同與鄭志乖者以羣后四朝文在堯典堯典是虞夏之書故

連言夏其實虞也故鄭志云唐虞之禮五載一巡守今知諸侯歲朝唯指唐虞也其夏殷朝天子及自相朝其禮則然其聘天子及自相聘則無文也云周之制以下周禮大行人文故大行人云侯服歲壹見甸服二歲壹見男服三歲壹見采服四歲壹見衛服五歲壹見要服六歲壹見是六者各以其服數來朝皆當方分爲四部分隨四時而來鄭注大行人云朝貢之歲四方各四分趨四時而來是方別各爲四分也近東者朝春近南者宗夏近西者覲秋近北者遇冬故韓侯是北方諸侯而近於西故稱韓侯入覲鄭云秋見天子曰覲又鄭注明堂位云魯在東方朝必以春魯於東方近東故也以此言之則侯服朝者東方以秋南方以冬西方以春北方以夏以其近京師舉此一隅自外可知悉案大宗伯云春見曰朝注云朝猶朝也欲其來之早夏見曰宗注云宗尊也欲其尊王秋見曰覲注云覲之言勤也欲其勤王之事冬見曰遇注云遇偶也欲其若不期而俱至時見曰會注云時見者言無常期諸侯有不

順服者王將有征討之事即春秋左傳云有事而會也殷見曰同注云殷衆也十二歲王如不巡守則六服盡朝四方四時分來歲終則徧每當一時一方摠來不四分也此六者諸侯朝王之禮又諸侯有聘問王之禮故宗伯云時聘曰問注云時聘者亦無常期天子有事乃聘之焉殷規曰視注云殷規謂一服朝之歲以朝者少諸侯乃使卿以大禮衆聘焉一服朝在元年七年十一年其諸侯自相朝則大行人云凡諸侯之邦交歲相問也殷相聘也世相朝也注云小聘曰問殷中也久無事又於殷朝者及而相聘也父死子立曰世凡君即位大國朝焉小國聘焉鄭知久無事而相聘者案昭九年左傳稱孟僖子如齊房聘禮也知凡君即位大國朝焉小國聘焉者以襄元年邾子來朝衛子叔晉知武子來聘左傳云凡諸侯即位小國朝之大國聘焉邾是小國故稱朝衛晉是大國故稱聘若俱是敵國亦得來聘朝故司儀云諸侯相爲賓是也若己初即位亦朝聘大國故文公元年公孫敖如齊左傳云凡君即位

卿出並聘若己是小國則往朝大國故文十一年曹伯來朝左傳云即位而來見也其天子亦有使大夫聘諸侯之禮故大行人云間問以論諸侯之志歲徧存三歲徧規五歲徧省間年一聘以至十一歲案昭十三年左傳云歲聘以志業間朝以講禮再朝而會以示威再會而盟以顯昭明賈逵服虔皆以為朝天子之法崔氏以為朝霸主之法鄭康成以為不知何代之禮故異義云公羊說諸侯比年一小聘三年一大聘五年一朝天子左氏說十二年之間八聘四朝再會一盟許慎謹案公羊說虞夏制左氏說周制傳曰三代不同物明古今異說鄭駁之云三年聘五朝文襄之霸制周禮大行人諸侯各以服數來朝其諸侯歲聘間朝之屬說無所出晉文公強盛諸侯耳非所謂三代異物也是鄭以歲聘間朝文無所出不用其義也言晉文公但強盛諸侯耳何能制禮而云三代異物乎是難許慎之辭也異義朝名公羊說諸侯四時見天子及相聘皆曰朝以朝時行禮卒而相逢於路口遇古周禮說春曰朝

夏曰宗秋曰覲冬曰遇許慎案禮有覲經詩曰韓侯入覲書曰江漢朝宗于海知有朝覲宗遇之禮從周禮說鄭駁之云此皆有似不為古昔案覲禮曰諸侯前朝皆受舍于朝朝通名如鄭此言公羊言其揔號周禮指其別名異義天子聘諸侯公羊說天子無下聘義周禮說間問以論諸侯之志許慎謹案禮臣疾君親問之天子有下聘之義從周禮說鄭無駁與許慎同也 五年至巡守 正義曰知五年是虞夏之制者堯典云五載一巡守此正謂虞也以虞夏同科連言夏耳若夏與殷依鄭志當六年一巡守也云周則十二歲一巡守者大行人云十有二歲王巡守殷國故知周制十二年也案白虎通云所以巡守者何巡者循也守者收也為天子循行守土收民道德大平恐遠近不同化幽隱不得其所者故必親自行之謙敬重民之至也所以不歲巡守何為大煩過五年為其大疏因天道三歲一閏天道小備五歲再閏天道大備故五年一巡守以此言之夏殷六歲者取半一歲之律呂也周十二歲者

象歲星一周也歲二月東巡守至于岱宗岱宗東嶽柴

而望祀山川柴祭天告至也覲諸侯覲見也問百年者

就見之就見老人命大師陳詩以觀民風陳詩謂采其詩而視

之命市納賈以觀民之所好惡志淫好辟

市典市者賈謂物貴賤厚薄也質則用物貴淫則侈物貴民之志淫邪則其所好者不正命典禮考

時月定日同律禮樂制度衣服正之同陰律也山

川神祇有不舉者為不敬不敬者君削以

地舉猶祭也宗廟有不順者為不孝不孝者君紕

以爵不順者謂若逆昭穆變禮易樂者為不從不從者

君流流放也革制度衣服者為畔畔者君討討

也也有功德於民者加地進律律法也五月南巡守

至于南嶽如東巡守之禮八月西巡守至于西

嶽如南巡守之禮十有一月北巡守至于北

嶽如西巡守之禮歸假于祖禰用特假至也特特牛

也祖下及禰皆一牛疏正義曰此一經論王者巡守四嶽柴望及

者皆以夏之仲月以夏時仲月者律曆當得其中也二月八月又晝夜分五月十一月者陰陽終故取四仲月也注

云岱宗東嶽 正義曰嶽者何嶽之為言稱也稱功德也必先於此岱山者言萬物皆相代於東方故歲二月東巡守至于岱宗宗者尊也岱為五嶽之首故為尊也 祭天告至也 正義曰柴祭天告至謂燔柴以祭上天而告至其祭天之後乃望祀山川所祭之天則蒼帝靈威仰 覲諸侯 覲見也謂見東方諸侯其見之禮案覲禮云諸侯覲於天子為官方三百步四門壇十有二尋深四尺 鄭注云王巡守至于方嶽之下諸侯會之亦為此官以見之是也覲禮又云天子乘龍載大旂拜日於東門之外反祀方明鄭注引朝事儀曰天子冕而執鎮圭尺有二寸云帥諸侯而朝日於東郊所以教尊尊也退而朝諸侯由此二者言之已祀方明乃以會同之禮見諸侯也凡會同者不協而盟盟時設方明於壇上乃以載辭告焉如覲禮及鄭注所云既告至之後為官加方明於壇天子出宮東門外拜日反祀方明祀方明之後乃徹去方明故鄭云由此二者言之已祀方明乃以會同之禮見諸侯云二者謂覲

禮經文朝日東門反祀方明朝事儀云朝日東郊退而朝諸侯故云由此二者言之已祀方明乃以會同之禮見諸侯也今於覲禮未祀方明之前未有見諸侯之事皇氏以為未祀方明之前已見諸侯非也其祀方明之後見諸侯之時王升立於壇上南面諸公中階之前北面諸侯東階之東西面諸伯西階之西東面諸子門東北面諸男門西北面王降階南面而見之三揖既升壇使諸侯升公拜於上等侯伯於中等子男於下等見諸侯訖若有不協更加方明於壇上諸侯等俱北面戎右傳躬血以授歆者司盟主其職故司盟云掌其盟約之載及其禮儀北面詔明神於時王立無文不可與諸侯同北面當於阼階上西面此是見諸侯之禮祀方明之時祭天則燔柴也天謂日也與此岱宗柴所用事別覲禮云祭天燔柴謂天子之盟也祭地燔柴謂王官之伯盟也祭山丘陵升及祭川沈者是諸侯之盟也此是巡守及諸侯之盟祭也故注云升沈必就祭者也就祭則是謂王巡守及諸侯之盟祭也祭天柴謂祭



日也祭地瘞者祭月也王巡守之盟其神主曰諸侯之盟其神主山川則王官之伯會諸侯而盟其神主月與今此王制所注岱宗柴者謂祭天告至而觀禮注引王制云王巡守至于岱宗柴是王巡守之盟其神主日又以柴為盟之所用不同者告至與盟必非一事鄭意證巡守盟時有柴故引岱宗以證之其實別也觀禮云為官即言加方明經文相連鄭注云王巡守至於方嶽之下諸侯會之亦為此宮則亦有方明但文不具耳故巡守祭天燔柴祭地瘞埋皆是祭方明也故鄭於方明設六玉之下汪云上宜以蒼璧下宜以黃琮而不以者則上下之神非天地之至貴者也以此言之明天子巡守之祭有方明也而皇氏云諸侯來就王會同有方明王巡守見諸侯無方明皇氏用之為說其義非也 問百年者就見之 此謂到方嶽之下見諸侯之後問百年者就見之若未至方嶽於道路之上

有百年者亦王先見之故祭義云天子巡守諸侯待於竟天子先見百年者下云八十九十者東行西行者弗敢

過道經之則見之則知百年者道雖不經所在就見之與此少別 命大師陳詩以觀民風 此謂王巡守見諸侯畢乃命其方諸侯大師是掌樂之官各陳其國風之詩以觀其政令之善惡若政善詩辭亦善政惡則詩辭亦惡觀其詩則知君政善惡故天保詩云民之質矣日用飲食是其政和若其政惡則十月之交徹我牆屋田卒汙萊是也 命市至好辟 命典市之官進納物賈之書以觀民之所有愛好所有嫌惡若民志淫邪則愛好邪辟之物民志所以淫邪由在上教之不正此陳詩納賈所以觀民風俗是欲知君上善惡也 命典至正之 典禮之官於周則大史也考校四時及十二月之大小時有節氣早晚月有弦望晦朔考之使各當其節又正定甲乙之日陰管之同陽管之律玉帛之禮鐘鼓之樂及制度衣服各有等差當正之使正堯典云協時月正日同律度量衡文雖小異大意與此同也 注同陰律也 正義曰鄭以先儒以同為齊同此律故辨之云同陰律也故大師云執同律以聽軍

聲又典同注云同陰律也不以陽律名管者因其先言耳所以先言者以同為平聲平為發語之本今古悉然故先言耳 山川至以爵 山川是外神故云不舉不舉不敬也山川在其國竟故削以地宗廟是內神故云不順不順不孝也宗廟可以表明爵等故紕以爵 不順者謂若逆昭穆 正義曰案文二年秋八月丁卯大事于大廟齊僖公逆祀也左傳曰夏父弗忌為宗伯曰吾見新鬼大故鬼小先大後小順也於是躋僖公於閔公之上是逆昭穆也 變禮至君討 禮樂雖為大事非是切急所須故以為不從君唯流放制度衣服便是政治之急故以為畔君須誅討此四罪先輕後重 律法也 正義曰律法釋詁文法謂法度諸事皆是即大行人上公九命繅藉九寸冕服九章建常九旒之等是也 五月至用特 言五月南巡至于南嶽者孔注尚書云自東嶽南巡守五月至則是從東嶽而去故鄭注尚書云每歸格于祖既言每歸似是嶽列一歸若嶽列一歸而更去便是路遠無由可至尚

書既云巡守四嶽即云五載一巡守鄭云每歸者謂每五年巡守而歸也其南嶽西嶽北嶽者案爾雅釋山云泰山為東嶽郭景純注云泰山為東嶽在奉高縣西北霍山為南嶽郭注云在衡陽湘南縣南郭又云今在廬江潛縣西漢武帝以說衡山遼曠因讖緯皆以霍山為南嶽故移其神於此其土俗人皆呼為南嶽南嶽本自兩山為名非從近也如郭此言則南嶽衡山自有兩名一名衡山一名霍山自魏武帝以來始徙南嶽之神於廬江霍山耳華山為西嶽郭注云在弘農華陰縣西南恒山為北嶽郭注云在常山上曲陽縣西北 假至至一牛 正義曰假至也釋詁文也云祖下及禰皆一牛者謂從始祖下及於禰廟別皆一牛鄭以經云祖禰用特恐同用一牛必知每廟皆一牛者以尚書堯典云歸格于藝相用特祖既用特明知各用特也唐虞及夏五廟則用五特也殷用六周用七也又尚書洛誥云文王駢牛一武王駢牛一是各用一牛也自此以上皆是巡守之禮雖未大平得為之故詩時邁巡

守告祭柴望也時邁是武王詩邁行也時未大平而巡守也故大司馬云及師大合軍以行禁令以救無辜伐有罪鄭注云師所謂王巡守若會同不言大者未有敵不尚武又注云大師王出征伐也以此故知未大平得巡守皇氏以為未大平不巡守非也其封禪者必因巡守大平乃始為之故中候淮議哲云相公欲封禪管仲曰昔聖王功成道洽符出乃封泰山今皆不至鳳皇不臻麒麟逃遁未可以封又禮器云升中於天鳳皇降龜龍假又鉤命決云刑罰藏頌聲作鳳皇至麒麟應封泰山禪梁甫管子又云封禪者須北里禾部上黍江淮之間三脊茅以為藉乃得封禪是大平祥瑞摠至乃得封禪也然武王之時未大平而時邁巡守之下注云天子巡行邦國至于方嶽之下而封禪也似武上得封禪者鄭因巡守連言封禪耳不謂當時封禪也白虎通云封禪所以必於泰山何萬物之始交代之處必於其上何因高告高順其類也故升封者增高也下禪梁甫之基廣厚也天以高為尊故增泰山之高以

報天地以厚為德附梁甫之基以報地刻石紀號者著已之功跡或曰封以金泥銀繩或曰石泥金繩封之印璽孝經緯云封於泰山考績潘際禪於梁甫刻石紀號又管子云自古封禪七十二家夷吾所識十有二焉無懷氏封泰山伏犧神農少皞黃帝顓頊帝嚳帝堯舜禹湯周成王皆封泰山唯禹禪會稽成王禪社首為異自外皆禪云云白虎通云三皇禪於繹繹之山明已成功而去有德者居之繹繹者無窮之意五帝禪於亭亭之山亭亭者制度審諦道德著明也三王禪於梁甫之山梁者信也甫者輔也信輔天地之道而行之所禪之山與管子不同者異人之說未知孰是云云亭亭繹繹梁甫並泰山旁小山名也

禮記正義卷第十六

